

方氏脉症正宗卷之四

嘔吐噦

古人云嘔吐噦皆責之熱。

又云噦爲空聲寒穀相攻而氣上逆也。

又云嘔屬陽明有聲有物吐屬太陽有物無聲噦屬

少陽有聲無物。

又云氣積寒分三焦之位。

愚按古人之言嘔吐噦者皆以初起暴病而言若久

新安方肇權秉鈞甫著




南京中医药大学图书馆藏

病而深者是為翻胃。另有門類。而古人多責之熱。却
要分別虛實。實者外入之熱。邪着把心胸胃脘之間。
煎燉血分。腑無潮潤。至使熱滯滯停。脾胃畏其蒸迫。
則嬾及磨化。妨碍飲食之消鎔。所以食則嘔吐。或乾
嘔者有之。虛者虛熱也。病到虛熱。胃亦弱矣。虛氣虛
火逆於胃脘。飲食不納。反而上行。亦為嘔。為吐也。惟
歸於寒者。合乎古云寒氣入胃。食飲衰也。
又云嘔屬陽明。有物有聲。夫陽明者胃也。容納食物
歸之當矣。若分吐屬太陽。有物無聲。夫太陽膀胱也。

列處下焦。且上無入口。越隔小腸。飲食焉能入乎。有
何物何口能反上而出乎。又分噦屬少陽。夫少陽者
胆也。為清淨之腑。無納無泄。飲食何由能入胆乎。然
後人亦靡乎宗之。遇斯症也。何治哉。

又云嘔吐噦分氣積寒三因。為上中下三焦之分。考
三焦之經絡固有之。若言三焦之臟腑則無也。所以
云三焦無臟空有名。按三焦之分在臟腑之外。上中
下之空區也。總而觀之。嘔吐噦屬於胃也。明矣。愚今
以熱寒氣分之。如嘔者有物有聲也。乃飽食過餐。壅

塞胃中。胃中本熱。不能受納。暴湧而出。冲動肺脘。故有聲也。其脉必數而有力。或洪大堅硬。治宜清熱分利之法。如吐者。有物無聲也。乃胃中已受寒邪。飲食入胃。不能受納。反而上行。未冲肺脘。故有物而無聲也。其脉必遲而有力。治宜溫中散寒之法。如噦者。有聲無物也。乃胃中虛氣。虛火氣隨火上冲。燻於肺。故有聲而空發耳。若氣虛者。脉則遲而無力。治宜益氣分。若虛火者。脉則數而無力。治宜滋陰降火之法。



至於胃虛者宜溫補。食積者宜消導。胃寒者宜溫之。
胃熱者宜清之。嘔吐有痰者理脾胃以消痰。此症之
藥入即吐者。宜五金為引而墜之。使藥性之稍停。累
日漸効。方得其力也。

愚常經歷嘔吐者。或作胃寒。或作胃弱。又作痰飲。投
皆不効。及至延久。又作翻胃。香燥浪投。致悞肌瘦者
有之。面浮黃者有之。間遇斯症。診得脉息數而無力。
以愚之補腎湯。或改六味地黃湯。多有得効者。久服
功全。此嘔吐之變症。成虛火之候。反而上行不能生

脾土則脾胃亦虛矣。所食之物自然不化而完出也。

又有翻胃之久。腎水將敗。亦得數脉。斯不足治也。已。

熱吐擬類清中消食湯

集錄胃苓湯

寒吐擬類小中風湯

加減附子理中湯

噦吐擬類和解湯

加減逍遙散

擬類調順陰陽湯

一人年六十歲。昔日飲燒酒過分。致有傷陰血之候。

病則脇肋痛脹。已二十年矣。常發時醫者以酒法治之。微効而不能收功。忽一日得大吐之症。延醫時亦。



以酒病之原告之。醫者仍以酒病治之。而吐益甚。舉家驚惶。後事皆脩。及延余治。亦告以酒病之由。脰得脉來俱遲。按之有力。余曰。悞也。汝之酒病發時。脇肋痛脹。今日之病是嘔吐。緣風寒之邪入於胃腑。與酒病何干。病者曰。吾老矣。恆於風寒。其子曰。父六月時。將門板橫於當門而熟睡。豈不受寒乎。只以憑脉用藥為當。余用附子乾姜二活厚朴吳茱萸白芷一劑。吐減五劑而全。



目

古人云諸脉皆屬於目。目得血而能視。

又云翳自熱生。宜先退翳後退熱。

又云疊疊目病屬於火。

愚按古人將害眼者另立一名眼科分七十二症。總以風火熱立論。與寒全無相干。後人因之主治。是兩皆不揣其本。又不能齊末。且不審脉理。分寒熱浪分五輪八廓。虛誇臟腑。信手用藥。溫涼倒施。難計不悞於人者也。殊不知人身中氣血流行經脉。是大熱也。



其行速。其脉數。是寒涼也。其行緩。其脉遲。遲數既明。寒熱攸分。非僅於眼科小技。而大方亦得之。以無差矣。愚望世之醫者。上不愧於天。下不忤於人。雖未能熟讀五車書。亦要焚膏繼晷。繹聖賢之意旨。窮醫中之原道。其於醫也。過半矣。

夫世之害眼者。惟切切於眼科。殊不知眼科者。全未達經脉。不諳臟腑。僅守前之始作俑者。風火熱之說。立之湯散。味多涼劑。點亦寒性。偶遇火熱者。頗得功效。若施之風寒在經絡。虛火上炎者。禍不旋踵矣。

又言先退翳後清熱。暗昧者宗之。若乃害眼者。聞說先退翳。以為効之速也。喜出望外。而樂從之。殊不知有諸內。方形諸外。豈有內未清。而外息者乎。是以後章辨明寒涼之翳膜。故愈退而愈厚也。無怪乎俗云。眼不醫不瞎。此之謂也。誠千載之弊歟。然愚與世之司眼科中暗昧者。素未相識。又無鼠牙雀角之爭。何責之甚哉。因念世之害眼者。上事父母。下蓄妻兒。雙目既去。則八口之家。無依。故爾心切。諄諄。期望達要。無悞於世也。今將眼科分為寒熱兩端。使害眼者按

症對書可以抄方而効。不必窮七十二症之煩。內障外障翳膜努肉之說。惟理諸內則順乎外。所干之邪自然消散耳。

如熱者有虛有實。實者或烟酒之過度。或酷日蒸晒。或燻炙辛辣。種種之熱。蘊結三焦。因目臟之先虛。邪從上出。目則紅腫如桃。如李。努肉眵淚。頭面燒熱。目不能開。開則羞明畏日。乃熱勝則血虛。血虛則熱又生。其脉必數而有力。治宜養血清熱分利之法。如虛熱者。或色慾之過度。或負重勞力之傷。皆能損

於氣血。干於腎水之虧。則虛火上炎。從目而出。亦微紅。而無眵淚。膚淫視。則無神。而常淚出。其脉數而無力。治宜滋陰降火之法。

如寒者。或酒後貪涼。或夜卧失蓋。或衣單以終歲寒。種種涼因。入臟腑經絡之中。年深日遠。氣血被傷。而邪出焉。亦緣目臟之先虛。則病上發。初則昏蒙翳膜。微上黃白之珠。漸無潤色。黑睛童仁。色帶乾黃。少精神之射亮。或未治內。輒點眼藥。豈知眼藥中涼性居多。點多不効。再尋粗工治法。服點亦皆涼性。使害眼。

者日益深矣。更有針鉤刀割者。徒使患目之苦。而受
無罪之刑法也。其脉必遲而無力。又久之目內加紅。
努肉皆多。此是腎水冰凝。迫起無根之火上炎。五心
潮燒。煩躁便赤。人多認之為熱。其脉猶遲而無力。至
斯時也。憑脉用燥劑。更助虛火之上炎。憑虛火而用
滋補。恐固寒邪之難出。處兩難之地。只可調氣血順
陰陽。合行度數。使久附之風寒。必隨氣血之流行而
出。則虛火上炎之患。亦賴氣血之調和自降而返其
位矣。累累為丸。久服功成。斯為穩妥之良方也。更有

日遠年深。服藥雜投之悞。脉變為數。則腎水枯竭。斯不足治也已。

按兩目乃人身之至要。如天之日月。容光必照焉。雖諸脉多屬於目。目得血而能視。更得腎水之榮華。斯為萬全也。又言翳自熱生。但熱者火也。萬物見火而消燂。何致留積乎。是寒則收引凝泣。必妨碍氣血之流行。所以寒涼之脉必遲。欠行度数。阻滯經絡也。觀河澗中水。滔滔然而流。一遇木石之擋塞。則隨水流行。滓雜經附之以停焉。致成堆墩也。而氣血之流行。

身中遇風寒之阻塞。亦如河澗中滓雜。番焉。且翳膜其色白。白則為寒。則知翳自寒生。與熱何涉乎。望司職者。要審脉理。方別寒熱。則用藥的當。使天下害目之人。不致廢軀也。幸甚。愚今立一湯。名調順陰陽湯。倍分兩為丸料。日下三次。一月又効。再修合之。久久功成。若急圖功。未可許也。

又有痘風眼。與痘後之費疾者。緣兒已受風寒於臟腑。氣血猶存。而病未發。致出痘之際。便有難調之理。雖然。收功致目之帶疾。誠醫者知脉理。別寒涼藥。兼



溫托使風寒之邪與痘并出。何廢疾之有此醫之過歟。只守其三六九朝之死法也。

擬類調順陰陽湯

擬類流氣湯

一人年及五十歲。家貧勞苦。兩目昏暗。微微淡紅。翳膜疊疊。神衰體倦。不能勤工。常臥於床。已數年矣。延余治之。診得六脉俱遲。遲乃寒邪久積。氣血兩傷。若用燥劑。以溫寒有碍於虛火上炎。若從目治。諛用滋補。有碍於風寒。只可以調氣血。順陰陽之正法。病者求急。余權用改附子理中湯。一劑不効。而目疾更甚。

